

Frieher

Ach, wie war's frieher doch manches Mol scheen.
Was hann die Leid Kinner kritt, oft üwwa zehn!
Ma hat alles in äänem Dibbe kinne koche,
zwar selten mit Wurschd, dofier äfder mit Knoche.
Sie sinn awwer all satt wor, ob siwwe odda zehn.
Jetzt sinn emol ehrlich, war's frieher nit scheen?

Erbse, Linse, Bohne unn quär durch de Gaade,
Kabbesgeschmetter unn Geheirade;
so e Haazschmier war aach e guddes Gefräß,
wie de Limburja, de Weiße unn de Haawekääs.
Mir hann alles gewamschd unn iwwahaabt nix blieb stehn.
Jetzt sinn emol ehrlich, war's frieher nit scheen?

De Budder war meischdens jo nur fier de Babbe;
de Toast hamma gemach uff de Oowebladde.
Unn genauso ginge aach die Pommfritt;
do hamma dann e bissje Senf debei kritt.
De Schnibbel Wurschd war meischdens aarisch klään.
Jetzt sinn emol ehrlich, war's domols nit scheen?

Wuzze unn Geiße faschd in jedem Stall,
manche hann aach Hase unn Hinkele gehall.
Die Pilze unn Beere hamma geholl ausem Wald,
aach es Holz fier de Winder, der war oft aarisch kalt.
Unn nääwe de Schul mussde ma alles holle gehn.
Jetzt sinn emol ehrlich, war's domols nit scheen?

Audos hat ma jo domols noch nit so gekennt.
For ze spiele simma off de Schdroß rumgerennt.
Unn beim Sunndachs - Spaziergang ins Schnabbacher Land
- de Rucksack uffem Buckel unn e Schachdel in da Hand -
hamma bis Dingmatt ze Fuß kinne gehn.
Jetzt sinn emol ehrlich, war's domols nit scheen?

Bairisch Bier, das war billisch unn fier de Babbe e Spaß,
beim Martin in Dingmatt, selbschd gebraut, direkt vumm Fass.
Fünf, sechs Halwe hat dort faschd jeder Babbe getankt
unn is um Hemmwäh im Wald hin unn här geschwankt.
Unn knochehadd gesung hamma - Groß unn Klään.
Jetzt sinn emol ehrlich, war's domols nit scheen?

Mit nein Jahr bin ich emol in die Ferie gang;
bei mein Schweschda, die war vaheirad in St.Johann.
Ich wollt doch mol gääre mit da Schdroßeböhn fahre;
doch die Mamme hat gesaad: "Das Geld kinne ma spare.
Du muschd jo nur de Schiene noh gehn."
Jetzt sinn emol ehrlich, war's domols nit scheen?

Schpielsache hat's aach noch nit so gebb wie heit,
mir hann uns schunn mimme Danknobb unn Kliggade gefreit.
Mir hann geschpield: Fra, willschde dei Kinner vakaafe?
Nä, nä liewa will ich dann beddele laafe!
Soldatsches hamma geschpield unn gezonkt wie die Hähn.
Jetzt sinn emol ehrlich, war's domols nit scheen?

Im Winder, do hann mir uns oft gefreit;
domols hat nimmand die Schdroße geschdreit.
De Babbe hat aus Bredda e Schliede gezimmert -
unn wer kenner gehat hat, der hat halt geschlimmert -
bis äänem weh gedohn hann owens die Bään.
Jetzt sinn emol ehrlich, war's domols nit scheen?

Unn wenn mir dann owens schbäd hemm sinn kumm
unn saße hungrisch um unser Disch erum,
do hat uns die Mudda de Inndobb vor die Nas geschdellt,
monschnol aach Grumbiere, nur grad mol gequellt.
Doch wem's nit geschmeckt hat, der kunnt grad widder gehn.
Jetzt sinn emol ehrlich, war's domols nit scheen?

Lauch, Zwiwweltunkes unn e Häring debei -
wie oft war das unser Naachtesserei.
Doch all simma scheen wor, kräftisch unn groß -
trotz Gequellde unn Häring, mit odda ohne Soß.
Unn noch emol froh ich eisch, bevor ich dann gehn:
Jetzt sinn emol ehrlich, war's domols nit scheen?

Helene Keller